







62931/B

$\frac{a}{29}$

217

The Library of the
Wellcome Institute for
the History of Medicine

MEDICAL SOCIETY
OF LONDON

Accession Number

Press Mark

NEVILLE, S.

XXI₅



Digitized by the Internet Archive
in 2019 with funding from
Wellcome Library

https://archive.org/details/b30548135_0004



TENTAMEN PATHOLOGICUM
I N A U G U R A L E,
P R O G N O S I I N F E B R I B U S :

Q U O D,
A N N U E N T E S U M M O N U M I N E,

Ex Auctoritate Reverendi admodum Viri,
D. GULIELMI ROBERTSON, S. S. T. P.
A C A D E M I Æ E D I N B U R G E N Æ P R Æ F E C T I ;

N E C N O N

Amplissimi S E N A T U S A C A D E M I C I consensu,
Et nobilissimæ F A C U L T A T I S M E D I C Æ decreto;

P R O G R A D U D O C T O R I S,
S U M M I S Q U E I N M E D I C I N A H O N O R I B U S E T P R I V I L E G I I S
R I T E E T L E G I T I M E C O N S E Q U E N D I S ;

Eruditorum examini subjicit

S Y L A S N E V I L L E,
B R I T A N N U S.

Soc. Med. Edin. Soc.

Sic ut quimus, quando ut volumus non licet. T E R E N T.

Prid. Id, Sept. hora locoque solitis.

E D I N B U R G I :
Apud B A L F O U R et S M E L L I E,
Academiae Typographos.

M, D C C, L X X V.



Viro Praestantissimo

JOANNI MANNING, M. D.

Sanandi artem apud Norvicences,
Summo cum honore suo,
Et civium salute,
Exercenti ;
Ingenio, doctrina, probitate, morumque urbanitate,
Insigni :

Et

Viro vere eximio, atque
Admodum reverendo,

CALEB FLEMING, S. S. T. P.

Humani generis amico,
Libertatis, et in civitate
Et in ecclesia,
Vindici acerrimo,
Vitae integritate, animi beneficentia,
Morumque puritate,
Omnium bonorum laude digno,

Hoc,
Grati animi et observantiae
Testimonium,
Offert

S. N.

TENTAMEN PATHOLOGICUM

I N A U G U R A L E

D E

PROGNOSI IN FEBRIBUS.

P R O O E M I U M.

SCRIPTORES antiqui Graeci et Romani, in omnibus fere artibus et disciplinis, praeclara et plane miranda ingenii monumenta dedere ; ex his sapientiae, humanam fere superantis, animi excelsi, fortitudinis, patriae et libertatis amoris, et omnis generis virtutis exempla pulcherrima petenda ; antiquorum eruditio et animi dotes virtuti aequales fuere :

Graius ingenium, Graius dedit ore rotundo
Musa loqui.——

In

In historia, eloquentia, et poesi, ab omnibus palmam abripuere ; et, si de eorum scriptis medicis idem dici non possit, id ignorantiae multarum oeconomiae humanae partium, quae hodiernis bene notae et familiares sunt, non ingenii aut curae defectui vel negligentiae,tribuendum. Ab inimicis studii antiquorum objicitur, eorum scripta multis erroribus et falsis theoriis scatere : Esto ; sed omnes qui sine invidia et praejudicio loquuntur innumeris observationibus egregiis, et factis utilissimis plena esse agnoscunt, et cum multa utilitate et fructu uberrimo perlegi posse ; venerandi semperque colendi *patris medicinae* egregia merita, famam, auctoritatem quis, ignorat ? *Aretaei* sagacitatem, et in morbis distinguendis describendisque diligentiam insignem, omnes qui ipsi sagaces sunt medici summis laudibus efferunt ; elegantia et facundia *Celsi* omnibus medicinae cultoribus, aequae ac purissimae Latinitatis amatoribus, semper placuit. Sed quid amplius dicam de re in qua inter omnes, saltem cordatiores, convenit ? Eleganter *Claudianus* ad studium antiquorum ita hortatur :

Interea musis animus dum melior instet,
Et quae mox imitere legas, nec desinat unquam
Tecum Graia loqui, tecum Romana vetustas.

Veteres

Veteres paucis medicamentis usi, et diaeta tenui et aquosa freti, *prognosi* maximam curam impendere, et observationes utilissimas de morborum signis, cursu, et eventibus, reliquerunt; sapientia etiam sua in difficilibus morbis distinguendis, et eventibus futuris praesagiendis, magnam et meritam laudem quaesivere.

Cum ergo fert animus antiquorum scripta quaedam perlegere, his rationibus, et rei dignitate ductus, nunc placet *de Prognosi in Febris* quaedam differere. Sed pauca de prognosi in universum praemittenda sunt. Et in tota materie tractanda sequentem ordinem observare liceat.

CAP.

CAP. 1. De Prognosi in univcrsum.

CAP. 2. De Prognosi in febribus.

SECT. 1. Fundamenta generalia praefagii in febribus.

Causae quae mortem directe inferunt.

Causae quae mortem indirecte inferunt.

SECT. 2. Reactionis nimis violentae, seu vis stimulantis, signa.

SECT. 3. Debilitatis, seu vis sedantis signa.

SECT. 4. Irritationis et debilitatis conjunctae signa.

SECT. 5. Proclivitatís ad putredinem in humoribus signa.

SECT. 6. De diebus criticis.

Eorum existentiam maxime probabilem esse.

Cur probationes nunc non aggredimur.

CAP.

C A P. I.

De Prognosi in Universum.

MEDICI recentiores theoriis et disputationibus suis implicati, et viribus medicamentorum chemicorum et aliorum valentiorum freti, magis in morbis subigendis et sanandis quam in eorum progressu et signis observandis operam posuerunt; nimis, ut opinor, prognosin negligentes, qua sane nulla pars medicinae est utilior aut praestantior, nulla ad aegri quietem, salutem, rectamve curationem, nulla ad medici dignitatem et honorem magis spectat: Cum enim omnium consensu novisse morbum et ab aliis recte distinxisse, primus est ad ejus sanationem gradus, nemo quidem incolumitatem aut praesagire aut aegrotis parare potest qui nec genus mali bene perspectum habuit, nec ejus eventum monstrare certis signis norit; is vero cui omnia haec nota sunt et cum majore confidentia et feliciori exitu curationem instituet, aegri amorem, maximam famam et gloriam

B † riam

riam apud omnes ex praefagio felici affequetur, et ſi ex ſignis infelix eventus expectandus ſit, praefagio ſuo culpam et vituperationem vitabit. Medici autem artis praefagiendi ignari, naturae ſtatum morbike progreſſum et vires non obſervantes, ſaepeius medicamentis prorsus inutilibus vel etiam nocentibus, vel utiliffimis, intempeſtive uſurpatis, utiles naturae motus aut impediendo aut interci-
piendo, eventus laethales inferant. Hinc ſit, ut quidam medici ſedulitatis et ſtudii neſcii, quorum conſilium praecipuum eſt opes cumulare, omnium de ſignis et praedictionibus ignari, vel in re deſperata incolumitatem et ſanationem promittant, vel, rebus integris et feliciter progredientibus, omnia metu, moeſtitia, et terrore impleant, ita dignitatem ſuam et artis turpiſſime prodentes, et hominum fidem in medicina ita turbantes. Tota etiam futuri victus in morbo, et curationis ratio ex praecognito ſtatu pendet, ut optime dixit Galenus de Crif. lib. i. cap. 3. ‘Generoſi autem medici atque arte Hippocratica digni eſt officium, futurum ſtatum praecognoscere, cum omnem victus rationem ad ipſum inſpiciens, inſtituat. Eadem ratione principium morbi, atque augmentum, non ubi jam perfecta ſunt, cognoscere, ſed multo antea praestabit praenoscere.’

Ex omnibus nunc dictis praestantia et nobilis natura hujus partis medicinae, gloria et fama quas medicis, securitas et animi oblectatio quas aegris affert, fatis superque apparent. Sed, ut ad rem nos accingamus, fatis stabilitum est fundamenta praesagii ex observatione virium naturae morbique ex toto pendere, ut nos docet Galenus de Constit. art. med. cap. 18. ‘Medicus quippe his duobus, morbo inquam et natura colluctantibus, animum semper intendit, atque dum discernit, quodnam horum robustius sit, primum quidem secum de salute hominis aut interitu, praesagium depromit; deinde vero, quo alterum altero fortius esse novit, tum et illius praefinitum tempus agnoscit.’ Igitur nullo alio modo melius salus vel interitus praevideri potest quam ex accurata virium tum morbi tum naturae notitia; si enim morbus fortior sit, eventus tristis omnino erit; si vero vires naturae validiores sint, aeger sine dubio convalescet, si nihil culpa vel ignorantia admittatur. At cum naturae victoria non nisi declinantibus morbis, aut saltem in eorum statu contingat, medici est, diligenter naturae et morbi viribus perspectis, an eae eousque perdurare possint, conjicere: Quod nisi faciat, de vita et morte praesagium haud probe instituere potest. Hinc praeter naturae et morbi

cog-

cognitionem, futuri quoque aegroti status seu vigoris cognitio erit necessaria. Ex his constat aequalibus naturae et morbi viribus observatis, ubi status seu crisis morbi cito futurus sit naturam morbum sine dubio superaturam, at tarde eadem crisi futura contrarium atque infaustum judicium fiet. Totam rem optime expressit Galenus in lib. iii. cap. de Crisibus ‘ Et quidem sine horum trium exacta dignotione nihil de salute investigari contingit, non magis quam hoc sciri potest, hominis robore, oneris magnitudine, et viae longitudine antea non perspecta: Nam aegri vires portanti onus, morbus vero oneri, tempus autem, quod usque ad statum extenditur, longitudini viae respondent.’

His omnibus collatis, patet totam doctrinam praesagii in morbis apud antiquos ex naturae et morbi viribus inter se compositis, atque morbi statu futuro dignoscendo, pendere. Sed manifestum est eorum regulas praecognitionis, utut bonas, vix satis definitas esse; innumeris et optimis observationibus atque factis plena sunt eorum opera, sed rationibus parum stabilitis et connexis. Quidam igitur ex recentioribus, viri doctissimi et de antiquis et de medicina optime meriti, hunc defectum supplere, nec absque successu, conati sunt; inter eos *Lud. Duretus* et *Prosp. Alpinus* magnopere

laudandi ; nec praetermittendus est Jod. Lommius qui breviter quidem, sed perspicue et accurate, praecipua antiquorum praefagia nobis dedit : Hi auctores systema dogmaticum instituere aggrediuntur, et facta ab antiquis ut vera observata rationatione confirmare ; verum et solum fundamentum omnis hujusmodi systematis ex *viribus medicatricibus naturae* adversus potestatem morbi pugnantis pendet ; sed difficilia quaedam et dubia hic oriuntur quae in sect. i. cap. seq. fusius explicabuntur.

CAP.

C A P. II.

DE PROGNOSSI IN FEBRIBUS.

S E C T. I.

Fundamenta generalia Praesagii in Febribus.

AD prognosin in febribus rite intelligendam, earum causae, tum *proximae*, tum etiam *remotae*, prius indagandae sunt. Sed talis disquisitio fines hujusmodi tentaminis longe transfret, et cum tota de febrium causis et differentiis doctrina a celeberrimo *archiatro* nostro tam clare, tam diserte, tanta eruditione, tali acumine ingenii traditur, nullo modo necessaria est.

Antiqui et eorum inter recentiores discipuli totum praesagium in febribus, aequae ac in aliis morbis, ex comparatione roboris naturae cum vi et
ma-

malignitate morbi petiere, febres in progressu varia symptomata exhibent, quae majoris vel minoris momenti sunt, prout malignitatem morbi, vel naturae vires et ad salutem proclivitatem, monstrant. Ex his quidem, si pro certo cognosci possint, veram ac certam prognosin stabilire oportet ; sed distinctio inter salutaria et mortifera signa est perdifficilis ; plerumque enim in febribus multa visa sunt symptomata de quorum natura et indole, et utrum ad vires medicatrices naturae, an ad vim morbi referenda sunt, non constat. Quomodocunque autem res se habeat, omnis de prognosi theoria ex doctrina de proxima morbi causa ejusque effectibus, mortem motusve ad sanitatem inducentibus, petenda est. Medici haecenus ex signis salutaribus praecipue prognostica sua condidere ; sed, ob varias et prorsus pugnantes de causa proxima sententias, et nostram de principio vitali ignorantiam, manca et inutilia adhuc videntur : Hoc praesagii systema doctrinam antiquorum et recentiorum multorum de materie morbifica, ejusque coctione et expulsionem, pro fundamento habet ; sed haec doctrina tam validis et sagacissimis argumentis in hac academia profligatur, ut nos morari non debet, nec
magis

magis doctrina visciditatis in sanguinis massa, nec quantitatis, vel acrimoniae bilis, &c. Et cum omnia febrium phaenomena nos docent, earum originem praecipue pendere ex mutationibus in statu *generis nervosi*, prognosis hoc fundamine tentanda est.

Primum inter omnes convenit, in omni febre alias esse conditiones ad mortem, et alias ad salutem et morbi amotionem, tendentes: Utrum prioris generis motus sine salutaribus unquam obtinent incertum, et ut magis curiositatis quam utilitatis relinquendum. Omnes tamen medici, solo Tenet excepto, consentiunt utriusque ordinis conditiones in omni febre praesentes esse, nisi in causae primo impetu, quando haec morbum producit eventus ex motibus bonis vel malis dignoscendus est. Ex signis salutaribus iudicium perdifficile est. Post illustres Hoffmannum omnes *spasmus* in initio febrium obtinere observarunt, cujus existentia morbi durationem, solutio ejusdem finem dat. Hucusque doctrina spasmi satis evidens est, et consilium naturae in cordis et arteriarum actione aucta apertum facit, nempe spasmus superare potius quam ullam in humoribus corporis mutationem inducere; et etiam bene explicat cur evacuationes semper comitantes febris solutionem efficiunt; semper

per enim spasmum relaxatio hujusmodi evacuationibus magis aut minus praestolatur. Sed fatendum est, hanc rem alio conspectu difficultatibus non carere, quando intermittens febris paroxysmus solvitur spasmus finem absolutum habuisse videtur; sed certe quaedam corporis conditio permanet quae reditum ejus producit, et sicut omnis febris a causa spasmum inducente oritur, hujus a motione sola aegri salutem renovare possumus: Sed ex doctrina febrium patet, causam spasmum inducentem debilitatem generis nervosi esse; sed hic obscuritas nos invadit, nam status sensorii communis, ex quo pendet debilitas, nos admodum latet. In stadio calido febrium sensorii communis vis plurimum augeri videtur, quae in actione cordis et arteriarum majorum etiam augeri satis apparet; sed mala conditio sensorii communis adhuc manet, et, ut sanguinis impetus primaria videtur potestas vim cerebri excitans, verisimillimum est actionem auctam cordis et arteriarum ad eam renovandam idoneam esse; perdifficile tamen est rationem reddere quare febres non ex toto sanentur durante primo paroxysmo, quando actio major est, et non nisi post plures, cum eadem actio minor et debilior est.

Ex his omnibus fatendum, rationem qua utitur natura ad sanitatem in febribus restituendam perquam obscuram esse, et ignorantia nostra principii ex quo pendent vita et sanitas difficultatem auget.

Quid igitur faciendum, cum ex signis *salutis* nulla *certa* prognosis trahi possit? Ex signis quae proclivitatem ad *mortem* ostendunt magis vera ac confirmata prognosis petenda est. De his autem signis ex causarum mortis in universum, et praecipue in febribus, notitia judicandum est. Quum vero vita ab *excitatione systematis nervosi*, quamvis ratio modusque ignoratur, pendet, et certas res externas potestatem habere hanc excitationem augendi minuendive aequae notum est; systema etiam animale ita constitutum esse ut vitam suam aliquamdiu sustinere possit, quia quaedam ejus functiones ad excitationem systematis nervosi, cerebri praecipue, sustentandam aptae sunt.

Satis igitur manifestum est, causas mortis duplices esse, *directas* vel *indirectas*. Prioris generis sunt ea quae in systema nervosum immediate agunt, incitationem ejus invadentes; hujusmodi sunt frigus, animi pathemata, excitatio nimis violenta, venena, &c. Posterioris generis sunt omnia functiones oeconomiae animalis ad principium

pium vitale sustentandum necessarias turbantia et delentia. Magni et illustrissimi viri Boerhaavius et Hoffmannus prioris generis causas vix tetigisse, et omnia ad posteriores retulisse videntur. Ad causas mortis speciatim considerandas nunc progrediendum, et primum causas directas.

Frigus. Ut calor est inter praecipuas systematis nervosi causas excitantes, ita frigus contrarium effectum habere existimari potest; et exempla non raro occurrunt: Sed in his casibus mortem a ruina systematis circulatorii et humorum congelatione multi oriri putant: Sed verisimilius est ex modo quo frigus somnum et mortem inducit, et ex effectibus diversorum graduum in animalibus somniculosis id gradatim et lente systematis nervosi vim minuere. Sed doctrina de natura et effectibus frigoris quibusdam difficultatibus involvitur, et vix hujus loci est, cum raro causa mortis in febribus est. In stadio frigido febrium intermittentium homines interdum moriuntur; sed verisimile est frigus effectum ejusdem causae esse quae et sine frigore mortem induxisset.

Animi Pathemata. Quosdam animi motus stimulant, et alios manifeste sedantes esse, satis constat. Primi generis affectus incitationem systematis

stematis nervosi augentes, secundi minuentes et debilitantes. Hujus exemplum timoris effectus dant, quos nemo ex ulla in systema circulatorium operatione directa oriri existimat, sed ex motu ob cerebri mutationem cessante. Sed haec haec tenus; hae enim causae rarius in febribus mortem inducunt, et reliquae saepius exitium ferunt, ita paulo fufius tractandae sunt.

Excitatio vel reactio nimis violenta, quae vel saepius iterata vim vitalem labefacit, vel violentia sua structuram cerebri ad actionem principii vitalis necessariam delet. Phaenomena somni et vigiliarum satis ostendunt talem violentiam morti occasionem dare posse. Verisimile est cerebrum ita constitutum esse, ut ejus excitatio ipsa postea excitationem imminuat, et collapsum inducat; nulla alio modo accessum somni intelligere possumus; et eodem modo percipimus unamquamque incitationem violentam debilitatem congruentem producere, et saepius repetitam tandem mortem inducere. Haec igitur cum aliis causis in exitu febrium lugubri multum potest.

Venena etiam mortem directe inducunt; ut causae mortis indirectae diu habebantur; sed nunc in genus nervosum immediate agere ab omnibus concessum. Medici in venenis definiendis in diversas

versas partes abiere ; sed sequens definitio nostrae sententiae satis convenit, ea, nimirum, esse corpora tollere excitationem potestatis nervosae directe tendentia, in febribus subito mortiferis, in quibus ante mortem sphacelus in quadam remota, et minus nobili corporis parte, locum habebat, probabile est mortem a veneno induci quando pars ipsa in qua extat sphacelus nullius momenti ad vitam est, et humores in multis casibus vix mutati vel inepti ad circulationem redditi apparent ; dicimus ergo mortem sequi *ex vapore seu halitu putrido* in corpore genito, et actionem sive incitationem cerebri delente. Utrum hic vapor sit ejusdem naturae cum aere mephitico non hic refert disquirere ; sed pestifera natura vaporum ex putredine orientium satis nota et confirmata est ; miasmata etiam quae tam conspicuam partem causae febrium remotae constituunt ex quadam putredine oriuntur, et a debilitate et morte subita ab iis interdum inducta, sedantis et debilitantis naturae semper videntur.

—aut ipsa saepe coorta

De terra surgunt, ubi putrorem humida nacta 'st,
Intempestivis pluviisque, et solibus icta.

LUCRET.

Causae

Causae mortis ex venenis pendentes ob conditiones sequentes variae, ratione virium, sunt. 1. Miasmata interdum tam fortia sunt, vel tanta copia ad corpus applicata, ut mortem immediate inducant. 2. Eundem effectum producere possunt debilitate ex paucis paroxysmis oriente adjuncta. 3. Interdum tam debilia sunt ut mortem non inducant, nisi ut fermenta agentia. 4. In multis febribus ad putrefactionem proclivitas in humoribus nostris perquam evidens est; utrum haec ex fermentis putridis, vel ex motu et calore pendeat, non hic inquirendum. Sufficit dicere, talem statum saepe venenum producere duobus modis agentem; primum in massam humorum circulantium eam putridam reddens. 2. Humoribus fluiditatem augens, qua varie effusi et stagnantes vaporem virulentum et lethalem, mortem saepissime inferentem, producant, et sectiones cadaverum jam dicta confirmant. Plurima exempla in operibus Morgagni, Ill. Pringle, Lind, &c. occurrunt, et in sectionibus mortuorum in celebri illa peste *Massiliensi*. Causae mortis quae in substantiam cerebri medullarem agunt inter directas numerandae sunt. Prima satis nota est, *compressio* ad propagationem motus in cerebro prohibendam sufficiens. Haec exitium etiam in febribus interdum inducit; sed raro,

raro, et saepius in aliis morbis ; igitur nihil amplius de ea in hoc loco dicemus. *Consumptio substantiae ipsius cerebri*, et *obstructio* vasculorum cerebri, peccato *liquidi visciditate depravati* a summo Boerhaavio inter causas mortis directas memorantur ; sed minus accurate, et tota res in febribus ad causas praecipue duas redit ; nempe, ad excitationem nimis violentam et venena.

Causae mortis indirectae sunt quae functiones ad sanguinis circuitum, systema universum humoribus, et corpus nutrimento supplendum, et ita ad vitalis principii continuationem et tutelam necessarias turbant ; sed quae functiones ad sanguinis circuitum necessarias corrumpunt, praecipue in febribus obtinent ; eas hic enumerare vix necessarium ; omnes fere mortem inducentes, quatenus a febribus oriantur, redeunt ad auctum sanguinis impetum, quo inflammatio aut effusio in partibus quarum functiones ad vitam sustentandam maxime necessariae sunt, et ex quibus resorptio humoris effusi non facile locum habet producitur. Quando enim resorptio aut evacuatio nulla est liquor stagnans in putredinem vertitur, et fatalis eventus fere semper comitatur. Causae igitur indirectae ex propria febre orientes inflammationi effusi-

effusione in viscera thoracica vel abdominalia plerumque referuntur. Ex causis igitur mortis et directis et indirectis fortiores in febribus videntur, excitatio seu reactio violenta quae impetu reiterato ipsum principium vitale exterminat, vel cerebri organizationem ad hujus principii actionem necessariam concidit, vel eodem impulsu organizationem partium ad sanguinis circuitum apprime necessariarum corrumpit. 2. Venenum principium vitale evertere valens. Tale est miasma vel contagio quae febris causa remota erat, aut putredo progressu morbi genita; utroque casu, effectus hujusmodi potestatis praecipue apparent vel in genere nervoso signa debilitatis, vel in massa sanguinis putredinem in ea, vel in humoribus ex ea orientibus inducentes.

Ex omnibus supra dictis manifestum est, signa eventus lethalis in febribus esse: 1. Symptomata graviora vis *stimulantis* seu reactionis violentae; 2. Vis sedantis seu debilitatis insignis; denique, 3. Proclivitatis ad putredinem in humoribus. Singula igitur symptomata quae unumquemque statum manifestant, nunc quaerenda et patefacienda sunt, ordine sequente; primum in omni statu, de signis ex functionibus *animalibus*; secundo ex functionibus *vitalibus*; demum ex functionibus *naturalibus*, provenientibus agendum.

S E C T. II.

*Reactionis nimis violentae, seu Vis Stimulantis
Signa.*

PRaeter delirium ferox quod potius est symptoma phrenitidis, five impetus in cerebrum localis, pauca hujus vis signa ex facultate animali pendent. Quaedam tamen, ut opinor, sunt, et, inter alia, *vigilia continua* quae in febris mala plerumque judicatur, stimuli et irritationis signum, delirium, convulsionem, et alia funesta inducens; multa exempla nobis reliquit Hippocrates aegrorum post vigilias perpetuas mortuorum, qualia sunt uxoris Dromeadae *; haec mulier a primo morbi die ad quartum insomnis; plerumque somno carere est morbi fortissimi manifestatio; inspicite historias multorum febricitantium in epidem. † traditas, in quibus somni absentia pessimos effectus producebat. Et de omnibus merito dicit di-

D

†

vinus

* Epidem. i. aegrot. 11.

† Lib. i. com. 2. &c.

vinus Senex *, ‘Pessimum vero est, si neque interdium neque noctu dormiat.’ Hujusmodi enim vigilia ex dolore vel anxietate magna vel delirio fere semper oritur, ut plenius Hippocrates nos docet †, ‘Pestiferum autem est non dormire nec interdum, nec noctu. Aut enim a dolore atque labore sic vigilaverit; aut, de hoc signo, suae non erit mentis.’ Magna enim vitae injuria est, si vigiliarum et somni vicissitudo nulla est in febribus, ut multi aegroti, in quibus omnia fere alia symptomata levia aut saltem mediocria erant, post hoc moriebantur.

Quippe patentia cum totas ardentia noctes
Lumina versarent oculorum expertia somno,
Multaque praeterea mortis tum signa dabantur.

LUCRET. lib. 6.

Nunc ad signa vis stimulantis ex *motrice facultate* petenda transeundum; hujus enim facultatis cognitio ad prognosin indagandam utilissima. Plurima quidem symptomata vis sedantis, sed pauciora stimulantis ex hac fonte oriuntur; *inquietatio* tamen seu *jactatio* interdum vis stimulantis signum est, quatenus motus vitiatio turbulenta sit, nempe,

cum

* In 2. Prognos. text. 12.

† In Coac. praesag. 3. text. 17.

cum morbi malignitate aut violentia aeger nullo consistit loco, sed varie se jactat, attollit, deprimit. Hoc symptoma praecipue apparet in ardentibus et maxime perniciosis febribus. Quod attinet ad prognosin, certum est omnem *inquietationem* sive *jactationem*, nisi criticam exacerbationem felicem prae-euntem, malum esse. Ita Hippocrates * Silenum moribundum sese multum jactasse memoriae prodidit; et de muliere in Mendacium foro decumbente † ait, ‘Septimo super-riguit, febris acuta, fitis ingens, se jactavit, &c.’

Neminem in rebus medicis quam minime peritum latere potest, signa ex *facultate vitali* ad praefagia in morbis condenda summi momenti esse. Haec cognitio ad naturae vires atque infirmitatem denotandas utilissima est; hinc Galenus ‡, ‘Si facultas vitalis potest morbi ferre vigorem, necesse est, servari hominem, atque ipsa nequeunte, mori.’ Robur vero seu infirmitas hujus nobilissimae facultatis ex actionibus ipsius robustis firmisque, vel laesis et debilibus, cognoscitur. Vitales vero actiones sunt pulsus et respira-

tio,

* 1. Epidem. com. 3.

† Epidem. 3. aegrot. 12.

‡ In Lib. de pulsibus cap. 34.

tio, et ex his vitae atque morborum status futurus deprehenditur.

Facultas vitalis in *corde* praecipue sedem habet, ut animalis in cerebro; hinc potestatis excitantis in illa facultate signa praecipua ex *actione cordis et arteriarum aucta* oriuntur. Haec autem actio ex vario statu *pulsus* atque *cordis* praecipue dignoscitur; sed de cordis actione ex statu *pulsus* tantum judicare possumus. De *pulsu* judicamus vel ex uno ictu vel ex multis simul sumptis. Ex uno icto primum de *velocitate*; 2. De *robore*; 3. De statu *arteriarum* naturam ictus *modificante*; in multis simul sumptis, primum de *frequentia*; dein de *aequalitate et constantia*, judicamus. Secundum hunc ordinem igitur *pulsus celer seu velox* primo considerandus est. Distinctionem inter *pulsus* celerem et crebrum, velocem et frequentem, quidam pathologi respuunt, sed perperam sententia aliorum peritia atque doctrina insignium; verum est quidem *pulsus* frequentem cum celeri saepe conjunctum esse, sed non ea proportionem ut distingui nequeant, saltem si infra 90 in 1 frequentia est; sed si amplius 100 eodem temporis spatio est non aequae, nam in hoc casu spatium a cordis systole occupatum breve est, et distingui non possit. Omnium tamen consen-

su pulsus celer, quando observari possit, irritationis et diathesis phlogisticae, ideoque vis stimulantis, signum est. *Pulsus creber seu frequens* hoc etiam loco considerari debet ; sed quaedam ambiguitas hic adest ; nam non raro pulsus frequentia ex sola debilitate oritur, et cum alia debilitatis signa talem frequentiam comitantur, ex hac causa oriri fere certum est : Sed si eodem tempore mediocriter robustus ac validus occurrit, potius signum stimuli ac irritationis quam debilitatis est ; et hoc sensu Galenus * ‘ Vehmens pulsus a facultatis semper robore fit, ac quo fit vehementior, tanto robur majus esse facultatis.’ Sed ea frequentia quae vim stimulantem validam ostendit proxime considerata est. Bene notum est, pulsum frequentem vocabulum relativum esse, secundum diversas hominum aetates. In infanzia enim 120, vel etiam 140 pulsationes in 1, sine periculo fiunt, sed per totam vitam postea, dummodo homo sanitate fruatur, constanter pulsus frequentia minuitur, ut tandem in homine quinquagenario vel sexagenario modus pulsationis ordinarius est 60 in 1. Status naturalis frequentiae igitur ex varietatibus aetatis, sexus, tem-

pe-

* In lib. 2. de praesag. ex pulsibus, cap. 7.

periei et naturae corporis cognoscendus est; hisque constitutis, alia differentia ex peculiari *idiosyncrasia* oriri possit; sed in hominibus justae aetatis status naturalis frequentiae a 60 ad 80 in 1 porrigitur. Doctissimus et peritissimus *Haller* 90 in 1, maximam naturalem frequentiam statuit; et concedendum est irritatione non magna ad hunc numerum augeri posse; sed in multis febrilem pulsationis statum a 70 in 1, incipere certum est; ideoque iudicium de frequentia ex natura atque temperie aegri praecognitis formandum esse.

Pulsus in *febre* ab 80 in 1, ad 120 in 1, surgit, et certe omnis major frequentia periculosissima est. Ill. *Haller* dicit, neminem aegrotum pulsationes 120 in 1, per aliquod tempus habentem sanitatem recuperare: Sed id viri illust. dictum cum grano salis accipiendum est; nam, ut quidam homines natura magis irritabiles sunt, eorum pulsus ex eadem causa multo magis frequentes quam aliorum non ita irritabilium fieri possint; et multi peritissimi medici confitentur febricitantium pulsus 120 in 1 saepe superare sine eventu fatali. Inter omnes tamen convenit, talem frequentiam, si per dies aliquot duret, summi periculi signum esse. Omnis tamen prudens medicus considerare debet, pulsum frequentem a multis
con-

conditionibus casu accidentibus, et ab accessionibus criticis salutari eventu stipatis saepe oriri.

3tio, *Vis ac robur* pulsus contemplandum est; ideoque *pulsus plenus ac magnus*. Pathologi saepe distinguunt pulsum validum a pleno et magno; sed quo fundamento nititur haec distinctio non satis apparet. Pulsus tamen plenus et magnus actionis cordis auctae fere semper indicium est, et, per se spectatum, est potius symptoma salutare; sed cum celeritate conjunctum irritationem et stimulum significat; et si stimulus cerebrum directe invadat et diathesis phlogistica eodem tempore locum habet, inter signa non minime perniciofa numerandum est. Et pulsus plenus qui cerebri affectionem *coma* inducentem plerumque comitatur pessimus est.

Pulsus *magnitudo* ex magnitudine in sanitate aestimanda est; nam in hac re inter diversos homines magna est differentia, quae partim articularum magnitudini diversae, partim earundem profunditati dissimili, tribuenda est. Igitur in comparatione pulsuum instituenda, utrumque carpum tangere necessarium est.

4to, *Status tensionis in arteriae tunicis* examinandus est; nam ex hoc *pulsus durus* vel *mollis* dignoscitur. Durus est, quando ictus magnitudo

et

et vis dispares sint ; ideoque in pulsu debili durities vel mollities vix discerni possit. Haec autem pulsus duritia nullo alio modo nisi constrictione et tensione arteriarum aucta explicanda est, et ut omnes phlegmasias ullius momenti semper comitatur vis stimulans sine dubio est, et diathesin phlogisticam ex tono arteriarum aucto pendere quam maxime ostendit. Si pulsus satis magnus sit, durities facile distinguitur ; sed si arteria parva sit, aliter res se habet, et utrum durities stimuli vel debilitatis effectus sit incertum manet, et ex aliis circumstantiis indagandum est. Ita saepissime pulsus parvus et contractus post V. S. major et plenior evadit ; sed si ex debilitate parvus fuisset, hoc evenire non potuisset. Sequitur igitur ex tensione a V. S. amota pulsum parvum fuisse.

Denique, *aequalitas* pulsus contemplanda est, id est, si ictus aequalia intervalla inter se observant, et non solum aequalitatem intervalli in multis ictibus, sed etiam aequalitatem in uno ictu observamus ; hae conditiones diversae interdum ex irritatione oriuntur, ut in *palpitatione* ; sed in febribus ex irritatione sola raro occurrunt ; et saepius debilitatis signa sunt, et saepissime irritationis et debilitatis conjunctae.

Haec

Haec igitur signa ex pulsu vim stimulantem significant, non autem ex uno tantum, sed ex multis inter se conflatis, iudicium ferendum est. Pulsus celer, creber, validus atque durus, irritationis et spasmī non minimum indicium est. Sed celer, creber, parvus, et inaequalis cum irritatione debilitatem conjunctam monstrant.

Alterum indicium actionis cordis auctae ex *calore aucto* peti possit. De difficultatibus doctrinae caloris animalis non hic agendum; inter omnes enim convenit, velocitatem sanguinis auctam calorem auctum inducere, qui igitur sic auctus ut effectus vis stimulantis contemplandus est. Fallaciae tamen in hac re est periculum; nam statum caloris in alio tantum cum nostro comparando scire possumus, qui variis conditionibus varius est; si igitur pro certo statum caloris scire velimus, thermometro utendum est.

Antiqui in quibusdam scriptis suis de calore *acri* verba faciunt, sed nihil paeter calorem magnum eos intellexisse verisimile est; iidem de *calore acri et pungente* loquuntur; talis autem calor est, ut videtur, quando calor ex *ictu pulsus* sentitur. Vehemens corporis ex *febre* caliditas semper mala est; de hujusmodi caliditate stimulante sequentia auctoris Prorrhēt. intelligenda,

E

†

‘ Æstuosi

‘Æstuosi rigores quadantenus perniciosi, &c.’
 Thoracis vel abdominis caliditas dolorifica semper fere funesta; nam morbi magni et lethalis signum est *, perquam eleganter poeta effectus hujusmodi caloris vehementis describit:

Intima pars homini vero flagrabat ad ossa:
 Flagrabat stomacho flamma, ut fornacibus, intus.
 Nil adeo posset cuiquam leve, tenueque membris
 Vertere in utilitatem: Ad ventum et frigora semper,
 In fluvios partim gelidos ardentia morbo
 Membra dabant, nudum jacentes corpus in undas.
 Multi praecipites lymphis putealibus alte
 Inciderunt, ipso venientes ore patente.

Lucret. Lib. vi.

Vis stimulantis status etiam ex *causa* peculiari intelligi possit, quae in febribus ex *systematis reactione* fere semper oritur, quae, si debilitati excutiendae aequalis semper erat, salutaris esset; sed interdum major interdum minor est; in his casibus vires medicatrices *spasmodum* systematis stimulum naturalem producunt; nunc igitur dicendum est, vim stimulantem secundum vigorem spasmi esse, vasa extrema praecipue a spasmo afficiuntur, ut
 ex

* Quaedam ad hanc rem habet Galenus, in lib. ii. de ration. vict. in acutis, et in lib. i. prognost.

ex arida cute, calore aucto paroxysmum febrium calidum comitante, apparet.

Linguae etiam ariditas spasmī statum monstrat ; hujus autem ariditatis causa est muci secretio imminuta ex constrictione excretoriorum ; saliva, mucus, et omnis humor qui partes tenuiores exhalare potest, sedimentum crassum semper reliquerant : Integra sanitate, humoribus integris, calore non aucto, nulla arteriarum constrictione, hujusmodi sedimentum est tenue, et semper humidum ; sed in febribus crassum, aridum, et saepe nigrum, et non solum linguae, sed etiam faucibus dentibusque, adhaeret. Niger tamen color in febribus ad putredinem vergentibus praecipue apparet ; sed tamen in aliis febribus per longum tempus durantibus non raro ; dicit gravissimus auctor *, hunc colorem ignearum seu ardentium febrium cum summo squalore esse proprium, perpetuoque non parum timendum, omniumque maxime, si una adfuerint signa alia perniciofa. Solet itidem ardentes pestilentes detegere ; in eadem sententia est Hippocrates †, ‘ Periculosissimam esse linguam nigram et pallidam ;’ et iterum,

* Prosp. Alpin. lib. v. cap. 9.

† In Coac. praefag. § 2.

rum, ‘nigro vero in iis facto colore, mortem denunciant.’ Lingua ficca, inaequalis, dura, horrida, exasperata, et rupta, pessima est. Tales ab Hippocrate in iisdem Coacis optime describuntur: ‘Lingua, quae in principio quidem inhorruit, in colore vero permanet; progressu autem temporis exasperatur, livescit, et rumpitur, lethalis est.’ Sed quomodocunque haec sint, certum est signa linguae fauciumve spasmi modum exprimere.

Aliud symptomata spasma et interdum caloris est *sitis vehemens et praeter naturam*; sed utcunque spectata vim stimulantem significat; aliae etiam causae sitis sunt observatione dignae; omnis acrimonia in sanguine sitim producit, ut ita diluta noxam nullam corpori producat. Sitis vero immoderata in febribus acutis semper fere mala, et una cum aliis signis malis aleae, et periculi plena. Hippocrates * aegrum tali statu laborantem verbis aptissimis ante oculos nostros ponit: ‘Tremores autem in manibus fiebant, et caput concutiebat, et oculorum intuitus pravi, et *sitis fortis*, et cum potasset, rursus petebat, et *rapiebat*, ac largiter bibebat; *avellere autem non poterant*, lingua
ficca,

* In lib. vii. Epidem. com. 3.

ficca, et manus ambas in os ferens manducabat, cum esset tremula.'

Infedabiliter fitis arida corpora merfans
Æquabat multum parvis humoribus imbrem.

Lucret. lib. vi.

Aliud spasmi signum est *aliarum secretionum imminutio*; quae varie apparet, perspirationis invisibilis, et urinae imminutione: Spasmus enim non solum in externis, verum etiam in internis partibus obtinet; ideoque alia signa ex secretionibus internis petuntur; *alvus astricta* indicium peculiare vis stimulantis semper aestimatur.

Alterum signum est *sanguinis extravasati status*: Sed de hac re multae difficultatis et dubitationis causae se ostendunt, et his immorari nunc non possumus; qui vero huic quaestioni curam impendere cupiat, in scriptis virorum celebrium *De Haen* et *Hewson* multa utilia inveniet. Sufficiat nobis in praesentia dicere, sanguinis ex vasis detracti superficiem coriaceam seu inflammatoriam vis stimulantis manifestissimum signum esse.

Hic etiam memorandus *dolor capitis*, qui a ple-
risque in initio febrium ad stimulum refertur.

Principio caput incensum fervore gerebant.

Hunc

Hunc dolorem antiqui signum appropinquantis phrenitidis habebant. Ita Gal. in 5. de loc. affect. et ex mente Hippoc. in 3. progn. capitis, in febribus continuis dolor vehemens et assiduus delirium praefagit; sed de hoc symptomate non minima est ambiguitas, quia interdum cum pulsu languido, et facie pallida, et in typho, ubi impetus laevis, evenit; sed tamen quoties calore, facie rubra, lucis et soni intollerantia stipatur, ex impetu sanguinis in caput manifeste oritur, et signum vis stimulantis aestimandus est.

Ordinis ratione necessarium erat omnia haec signa vis stimulantis sigillatim considerare; sed iudicium nostrum ex plurimis conjunctis stabilendum est; huic conducit omnia signa supra explicata breviter recensere; haec autem sunt, vigilia, jactatio, pulsus velox, frequens, validus, et durus, calor auctus, et alia spasmi signa; lingua fordida atque arida; sitis praeter naturam, alvus astricta; denique, crusta sanguinis coriacea. Si omnia haec vel eorum plurima in febre appareant, certum est vim stimulantem in aegroto praevalere; haec autem nimia stimulans vis, violenta excitatione facpius iterata, et debilitatem inducente, periculosa est. Sed hujusmodi actione aucta per systema universum manente, raro per se fatalis est; et si ad nul-

lam

lam partem nobiliorem determinata, facile plerumque medicabilis, et universaliter in febre minus periculosa est quam debilitas.

Vis in febribus stimulantis in *partes determinatio* varias *phlegmasias* efficit; de quibus nunc non differendum. Verum quidem est, in sectionibus cadaverum a hujusmodi febribus mortuorum, inflammationem et gangraenam in variis visceribus interdum inveniri, quamvis vita durante symptomata peculiaris talium inflammationum nusquam apparebant, et in prognosi condenda hujusmodi inflammationum occultarum signa investiganda esse; sed si in tali dissertatione haec omnia tractarem, extra fines duceret; igitur alia signa mortis in febre *pura* attingamus.

SECT.

S E C T. III.

Debilitatis, seu Vis sedantis, Signa in Febris.

STIMULANS vis, cum aliis causis conjuncta, mortem inferre potest : Sed vis de qua nunc agere institutum est, in febris ante omnes mortifera ; ideoque ex ea praesagium mortis in febris praecipue petendum est. Debilitas in febre sine dubio maxime praevalet, et tantum dubitatur utrum ejus causa vel effectus est, quodam nomine ut effectus intueri possit ; sed debilitatem plerumque aliis omnibus symptomatibus priorem esse, satis constat ex *miasmatis* et *contagii* effectibus, quae nostris corporibus sedantia forsitan sunt, et saepissime omnia debilitatis signa ante reactionem morbi etiam initio producant.

Signa debilitatis nunc figillatim contemplanda sunt ; proinde ut ex animali, vitali, et naturali facultate oriantur.

Motu

Motus voluntarii laesi apparent, 1. Vigore imminuto ; 2. Motus inaequalitate, et intervallis, et vi.

1. *Vigore imminuto.* 1. *Lassitudo* est inter prima signa febris. Primo aeger difficultatem stando vel ambulando sentitur, et discumbere ei necessarium est ; et protinus recumbere ubi pauciores muscoli intenduntur, tandem decubitus in latus molestus est, et tergo quiescit ; sed etiam in hoc situ muscoli pauci agunt, et in debilitatis progressu aeger in lecto prolabitur, vel genua se sustinendi causa protendit : Sed interdum id etiam extra vires est, et membra, ut cadaveris, ex lecto prona jacent ; haec confirmant multa in Hyppocrate, et aliis antiquis. ‘ At gravitas totius corporis et manuum ac pedum mala est *.’ ‘ Si vero proclivior est, ac deorsum delabitur subinde ad pedes, majore cum periculo est † ;’ et diserte Galenus ‡, ‘ Scito igitur nunc dejectionem appellari, cum quis modo *hominis viventis* decumbere non potest, sed tanquam *mortuum inanimumque corpus* deorsum fertur.’ Multa alia antiquorum testimonia adducere possum ; sed haec sufficiant.

F † Debilitas

* In coac. praesag. text. 493.

† Hippoc. in 1. progn.

‡ Lib. 1. de humorib.

Debilitas etiam ex aspectu *vultus* et *oculorum* judicari possit, faciei muscoli varie ex variis animi passionibus aguntur et evolvuntur, in sanitate mira alacritate et vivacitate praediti. Igitur eorum *flacciditas* in febribus pessimum signum est. Hippocrates * scribit, ‘ Considerari convenit hunc in modum per morbos acutos principio vultum aegroti, sitne similis bene valentium, potissimum sui, ita enim optimus erit; si vero quam maxime contrarius simili sit, exitiosissimus est;’ et Galenus in comm. Hippocrati suo assentit.

In motu veloci, alacri, et vivida *oculorum*, in eorum splendore, bono colore, &c. sanitas maxime apparet; ideoque contraria conditio debilitatis et morbi non parvum indicium est. Praesagia ex oculis apud antiquos celebrantur †, ‘ in febre non intermittente, si vel non audiat, vel non videat, jam debili existente corpore, mors proxima est ‡.’ ‘ Oculi audacia, delirii signum est; et dejectio, et fractio malum §.’ Et ex innumeris aliis veterum

* Lib. 1. progn.

† Vid. Hippoc. lib. 3. Epid. aegr. 3. Coac. praesag. lib. 3. ‘ Qui in febre continua muti jacent oculis conniventibus,’ &c. Prognost. 1. ‘ Si enim lucem effugiant;’ et sequentia.

‡ Lib. 4. Aph. 49.

§. In 6. Epid. sect. 1.

rum locis constat, hoc signum summi ponderis esse. Et inter recentiores plura de ejus praestantia apud illust. Lind videnda.

Motus irregulares debilitatem quam maxime patefaciunt; hinc *tremores* in motibus voluntariis, in febre castrensi, et aliis typhi speciebus, quam maxime malignis, conspicui. Quando lingua iisdem tremulis motibus afficitur, majoris debilitatis indicium est. ‘Jure igitur optimo, dicit Galenus*, tremorem ex virium infirmitate perpetuo fieri demonstravimus.’ Idem in alio loco † ‘tremor igitur linguae accidit, debilitata animi facultate;’ praesagium funestum ex tremore etiam illuxit in sene de quo Hippoc. cujus eodem tempore extrema frigida erant. Sequentia etiam Hippoc. in eodem libro ad hoc respiciunt ‡, ‘incipientibus veluti subtremuli, et digiti et labia cum loquerentur, itidemque aliae partes.’

Denique, *spasmus* in musculis diversis debilitatis in facultate motrice signum est. In musculis ad velocem et vividum motum aptis, ut oculorum, praecipue apparet. Ob hanc causam oculi interdum fixi et immobiles videntur, interdum palpebrarum

* In comm. de Trem. convuls. et rig.

† 1. Prorrh. text. 19.

‡ Lib. 4. Epid.

brarum et oculi globi motus non congruunt. Signa oculorum mala praecipua luculenter nobis dedit medicinae antiquae princeps *. Oculus stupidus debilitatis praecipuum symptoma est. Auctor Prorrhēt. nos docet † ‘Hebetatus oculus, vitiatusque, et concretus, immobilisque, et tenebrosus si fuerit, malum ;’ et recte ; nam in febribus fere semper lethale, nisi ex causa aliqua critica oriatur. Hoc symptoma exitiale observabatur ab Hippoc. ‡ de virgine illa pulchra Nerei quae

————— ‘merita nec morte peribat,
Sed misera ante diem.’ ——— VIRG. ÆNEID.

Multa alia de oculorum in febre signis ex antiquorum scriniis proferre possem ; sed brevitatis operis non finit.

Ex eadem debilitate maxillae inferioris musculi spasmus afficiuntur. Hinc *trismi* species vel *stridoris dentium* in febribus interdum occurrens. Plurimi alii musculi convulsionibus momentaneis afficiuntur, et ut *carpum* praecipue observamus : Hinc *subsultus tendinum* ; convulsio manuum ac pedum ab Hyppoc. § in Eraclitis uxore observata

* Prognost. text. 35. Aph. 4. 49. antea citato.

† Lib. i. 46.

‡ Epidem. lib. 5.

§ Epid. vii. 108.

fervata hujusmodi fuisse videtur ; eoque etiam perversiones in aphor. 4. 49. observatae.

Sensorii communis functiones etiam ex animali facultate pendent ; harum status saepissime debilitate febrili afficitur ; ideoque primo,

Languor tandemque *desperatio*, in febrium funestissimarum initio, saepe apparent, et signum quam maxime mortiferum praebent ; de animi pathematum origine et causis non est locus differendi ; tantum observandum est, ea debilitati vel vigori in sensorio communi quam maxime congruere.

Haec desperatio, omnis spei ab initio abjectio, et fatalis eventus timor in pessimis febribus typhi generis maxime insignis est. Poeta philosophicus *Lucretius*, in elegantissima sua pestis celebris *Atheniensis* descriptione, hoc symptoma ita memorat.

Atque animi prorsum vires totius, et omne
Languibat corpus, lethi jam limine in ipso ;
Intolerabilibusque malis erat anxius anguor
Assidue comes, et gemitu commista quaerela.

Et postea,

Perturbata animi mens in maerore, metuque ;
Triste supercilium.———

Illud in his rebus miserandum et magnopere unum
Ærumnabile erat ; quod, ubi se quisque videbat

Implici-

Implicitum morbo, morti damnatus ut esset,
 Deficiens animo moesto cum corde jacebat.
 Funera respectans, animam et mittebat ibidem :
 Idque vel in primis cumulabat funere funus.

Lucret. Lib. vi.

Sensus interni plurimum turbati plerumque in febre sunt ; id ostendit *idearum confusio*, *memoriae laesio*, et hinc *consociationis usitatae* perturbatio ; talia igitur animi turbati prima signa : Postea somnus infomniis turbatus ; infomnia et deliria in multis conveniunt ; prior posteriorem proxime advenientem saepe monstrat ; animi tamen inconstantia manente, *delirium* manifestum est, quod, uti infomnium, ex cerebri inaequali excitatione vel collapsu oritur ; sed in debilitate semper ex posteriore ; furor nullus, nulla ira, sed tantum placida imaginationis sermonisque inconstantia et mutabilitas, nulla corporis agitatio ; inquietudo nulla, sed primo somnolentia quaedam, ex qua tamen aegrotus facile excitari possit, amicorum et rerum usitatarum conspectu, tandem vero memoria labefacta his abigi non potest.

Delirium igitur hujusmodi a pathologis *mitis* nominatum, in summo gradu est quando aeger, consociationis usitatae immemor, suum lectum, cubiculum suum, consanguineos, amicos, et fami-

familiares suos ignorat. Tales delirantes, Gale-
no teste *, nedum tumultuose non exclamant,
non exsiliunt, sed quieti quinimo jacent, &c. Et
in Prorrh. tales desipientiae vocantur, ‘ tremu-
lae, obscurae, contractabiles :’ Ejusdem generis
signum est *pudoris* et *verecundiae naturalis* in
quibusdam functionibus amissio, uti foeces urinam-
ve in lectis expellere, ita aliqui cum vas ad min-
gendum tenuerint, mingere in eo non recordan-
tur, sed in lecto mingunt. Haec plerumque me-
moriae amissionis signa sunt, quamvis ex muscu-
lorum sphincterum paralyfi interdum oriuntur.
Huc respiciunt Hippoc. † sequentia : ‘ Deliria
circa necessaria, pessima ; quae ex his exacerban-
tur, lethalia sunt.’

Somni atque *vigiliarum* doctrina in quibusdam
obscura est. Sufficiat hic dicere, somnum ex fa-
cultatis animalis collapsu pendere ; igitur ad som-
num magna inclinatio excitationis cerebri immi-
nutae, ideoque debilitatis signum est. Sed quan-
do nec advenit somnus, et aeger cito excitatur, po-
tius *Typhomaniae* nomine venit, quae irritationem
conjunctam indicat.

Coma

* Lib. 1. Prorrh. 33.

† In Coac. Praesag. 3.

Coma ejusdem generis signum, sed minus periculofum, nisi jam provecto morbo. De his omnibus observandum quod dicit Hippocrates *, ‘Somnus atque vigilia utraque, si naturae modum excefferint, malum.’ ‘In quo morbo somnus laborem facit, mortale †.’ Mali omnes somni, ut recte observat Galen. in comm. haberi debent, qui nihil juvant, et omnium maxime qui evidenter laedunt, ut plenius Galenus in loco citato.

Sensus sitis sublatuſ in hoc loco memorandus; ſemper in febribus aegrotantes moderate ſitire bonum; ſitis enim febrem fere perpetuo comitatur. Sed quamvis plerumque calor et ariditas in ore et faucibus, cum putredine in ventriculo, cauſae ſitis manifeſtae, adſunt; ex debilitate tamen ſenſorii communis mens eam non ſentit; hinc Hippocrates ‡, ‘Sitis quae non ex ratione in acutis morbis ſolvitur, mala eſt.’ Funetiſſimum hoc eſt ſignum, praefertim ſi alia exitialia ſigna una apparuerint. In hanc ſententiam optime ſe exprimit Galenus ||, ‘Huc acceſſit ad cumulum aliud ſignum

* 2. Aphor. 3.

† 2. Aphor. 1.

‡ Prorrh. i. 57.

|| Lib. i. Epidem. com. 2

signum exitiosum, quod cum antea aestuassent, *amplius non sitirent*; atqui quando, qui antea *si ti flagrarent*, postea essent a *siti liberi*; horum duorum sit necesse est alterutrum, aut morbi solutio, aut virtutis extinctio, ita ut praesentia mala amplius non sentiant; at non contingit a morbis his vindicari, siquidem exitialia erant symptomata.* Hunc statum morbi Hippocrates eleganter pinxit in historia Hermocratis, 3. Epidem.* ubi inter alia sequentia observat, ‘Lingua initio adusta fuit, somnum non habuit; vigesimo perpetuo a cibo abhorrebat, omnino mente constabat, loqui non valebat, lingua inaruit, *non sitiebat*, obdormiscebat aliquantisper comatosus.’

Visus Defectio, in febribus, est aliud vis debilitantis symptoma mortiferum; ut enim nullum sensus instrumentum est magis perfectum, ac exquisite delicatum; nemo vitium in eo esse hoc casu existimat. Hoc signum ab Hippocrate, in Aphor. †, et etiam in Coacis memoratur, ‘Jam labascentibus viribus, siquidem aeger *non videat*, aut non audiat, vel a labro, *oculo*, nare, distorqueatur, *lethale*;

G † tenebras

* Com. i. Ægrot. 2.

† Aphor. iv. 49.

tenebras, vel caliginem ante oculos versari, aut affundi splendores aliquos, aut eum lucem ferre non posse.

Et duplices oculos suffusa luce rubentes.

De Nat. rer. Lib. 6.

Aliquando tamen sine dubio ex vitio instrumentorum fit visus vitiosus, perturbatus, tenebrosus, quamvis ex statu sensorii communis oriri videatur: Sed multa suadent, ex statu instrumenti pendere interdum, aequè ac ex collapsu sensorii communis. Ita multa loca parva obfufcari in omnibus corporibus vicinis ex collapsu partiali nervorum optico- rum oriri videtur; hoc fundamento nititur observatiffimum illud mortis signum,

Floccorum collectio, et ab antiquis, et a recentioribus, saepissime memoratum. Disertissime Hippocrates*, ‘de gesticulatione manuum haec cognoscere oportet, qui in *febre acuta*, aut phrenitide, aut pulmonia, &c. manus ob os fert, aut frustra venatur muscas, aut colligit festucas, aut de veste evellit pilos, aut de pariete stipulas carpit, id omne malum exitialeque est.’ Talis desipientia Galeno etiam fatalis visa, ut ex multis
in

* 2. progn. 23.

in ejus scriptis locis colligi possit. Hujus status descriptio tam exquisita a Coe nostro in historia uxoris Dealcis datur, ut eam hic referre abstinere non possum. ‘Ab initio co-operiebatur, et perpetuo tacita semper, villos straguli captabat, vellebatque, et scalpebat, plorabat, moxque ridebat, non dormiebat †.’

Vifus defectio inter signa mortis appropinquantis observatur; tum enim, extincta fere animali facultate, aliarum omnium facultatum actiones cito extinguuntur.

Ad vitalis facultatis functiones nunc progrediamur. *Cordis et arteriarum* actio in omnibus febribus debilitate subnixis maxime debilis est. Hujus debilitatis signum est *syncope* vel *animi deliquium*, quod ex deficiente cerebri in *cor* vi oritur; nam praecipue apparet quando corpus erigitur.

Syncope autem non semper adest; igitur de debilitate actionis cordis atque arteriarum, praecipue ex *pulsu*, judicamus. Pulsus debilis frequens, et inaequalis, semper debilitatis signum est. Si enim cordis actio debilis sit, ejus ventriculi non deplentur, ideoque cor ad novam contractionem citius stimulatur. Omnis musculi
actio

† Lib. 3. epidem. com. 3. aegr. 15.

actio ex debilitate inaequalis fit, et inter alios cordis.

Pulsus tardus a quibusdam in febribus ex debilitate observatur; sed raro occurrit, testibus praestantissimis medicis, nisi quando *coma* praesens est; et tum debilitatem significat, sed minus periculosa.

Calor corporis vigorem circulationis ostendit, ideoque calor auctus inter signa vis stimulantis memoratur. Calor plerumque febrem comitatur; in quibusdam tamen abest, vel saltem minor est, et typhum designat, quo in morbo quam maxime pollet debilitas; ubi igitur calor corporis non est pro ratione pulsus frequentiae debilitatem monstrat.

Calor auctus linguam aridam efficit; ideo *lingua humida* in febre debilitatem et febrem typhum notat.

Sensus frigoris est aliud debilitatis signum; circuitus enim imminuti indicium est. In initio febrium frigoris, sine horrore, tremore, aut rigore, sensus, vim maxime sedantem in causa monstrat; horror enim, tremor, et rigor reactionis validae signa manifesta sunt. Sed post morbum aliquamdiu progressum, nulla ambiguitas. In partibus extremis et prominentibus frigus ut debilitatae

bilitatae cordis actionis signum, et praesagium maxime exitiale, ab antiquis memoratur. Ex multis quae dare possem, sequentes observationes et exempla, ex eorum operibus, capiat lector. Hippocrates de Philisco lethaliter aegro ita scribit: ‘*Extremities* undiquaque *frigebant*, nec jam ad calorem amplius redibant *,’ quod multis aegris suis ante mortem contigisse, in libris epidem. nos docet. Cum extremarum partium frigiditate lividitas conjuncta pessimum est. Ut Celsus in Philisco, Sileno, Erasino, et aliis aegris moribundis, observavit. Alia signa exitialia cum hoc semper apparent. De Pythone in Thaso mortuo decem diebus ita scriptum: ‘*Altero die sub meridiem extremae partes frigebant*, praeter caeteras, manus et caput, obmutuit, voce defectus est, diu brevi spirans,’ &c. †. Peculiares quasdam observationes de facie pallida, de frigiditate in naso, auribus, &c. instituti nostri brevitatis recensere vetat.

Ad debilitatem etiam pertinet vasorum rubrorum in tunica conjunctiva *absentia*, et musculorum faciei collapsus. Faciei turgiditas a vasorum pleni-

* Lib. 1. epidem.

† Lib. 3. epidem.

nitudine pendet. In animi igitur deliquio facies in omni parte labascit, et facies *Hippocratica* vulgo dicitur, ob multas *Coi illius magni* de ea observationes. Quarum una disertissima hic apponenda; in ea enim, quasi *tabula picta*, aegrum jamjam moriturum ante oculos nostros ponit: ‘Nasus est acutus, cavi oculi, adstricta tempora, aures frigidae contractaeque, et fibrae earum verae, et item cutis circa frontem dura, intenta, arida, et color totius vultus viridis, aut niger, aut lividus, aut plumbeus *.’ Facies hujusmodi *cadaverosa* merito vocatur.

Huic signo conjungendus est *sudor frigidus*, praecipue circa caput et collum. De aegrotis in febre pestilenti dicitur,

Sudorisque madens per collum splendidus humor,

De nat. rer.

Ex experientia scimus, hocce signum debilitatem notare; sed qui fit, non tam facile explicatur, nisi ex vasorum sanguiferorum relaxatione oriatur; hujusmodi sudores, seu *desudationes*, ut a quibusdam vocantur, aegrum nihil allevant, sed fere semper exitiales sunt. De hoc signo antiquorum testimonia innumera,

* I. prognos.

innumera, pauca tantum ad stabiliendum ex eo praefagium utilia, hic citanda. Merito dicit Hippocrates in Prognost. ‘Pessimi vero, qui *frigidi* sunt, et qui circa caput tantummodo eveniunt, vultum et cervicem. Hi enim cum acuta febre, mortem; cum mitiore, morbi longitudinem, indicant.’ Et in postrema constitutione pestilenti, cujus nobis dedit historiam, hoc symptoma in multis aegris moribundis observabatur; in Philisco *, ‘quintum sub diem obmutuit, *frigida sudavit*; extremae partes livescebant; die sexto ad meridiem est defunctus.’ In uxore Dromeadae † ‘*extrema membra frigida*, toto tempore *sudavit*, deliravit, spiritus magnus, rarus, paulo post convulsionem a capite coeperunt, subito obiit.’ Talis sudor alia prava signa sequens certissimi exitii indicium est. Talis fuit uxoris Olympiadae, cujus historiam Cous in Epidem. 7. enarrat, ‘Vox non solvabatur, neque ipsa quicquam allevabatur, oculi tristes, spiritus sublimis, qui per nares trahebatur, color pravus, *sudor circa pedes et crura*, cum jam circa mortem esset.’

Sedantis vis effectus in statu *respirationis* faepissime apparet; respiratio parva, frequens, et cum labore,

* Lib. 1. epidem. aegrot. i.

† Lib. 1. epidem. aegrot. xi.

labore, debilitatis signum est ; non tamen sine ambiguitate ; nam idem symptoma, ob sanguinis circuitum difficilem, ex *obstructione* in *pulmonibus* oriri possit. Sed quum alia obstructionis signa absint, debilitati tribuendum est ; ratio et modus hujus symptomatis ex *doctrina respirationis* petenda est, et hic praetermittenda, quia explicationem in praesentia nimis longam requirit. Hippocrates plus huic symptomati in praesagiis suis, quam pulsui, tribuisse videtur. Ita * dicit, ‘Spirationis autem facilitatem existimari oportet perquam magnam vim habere ad salutem in omnibus morbis acutis.’ Et in eadem sententia est Galenus, in Comment. suo, ‘Bona respiratio thoracem, cor, et omnes alias partes servientes respirationi, recte valere demonstrat,’ &c.

Respiratio quae vocatur *sublimis* extremae debilitatis plerumque signum est, et una cum aliis malis signis fatalem eventum denunciat. Exempla in uxore Olymp. nunc memorata, et in Aristocrate moribundo, ‘Ad noctem *spiritus sublimis* est factus, sudor exiguus circa frontem, infernae
‘ partes

* 1. Prognost.

partes frigidae, anxius *.' Interdum tamen *obstructio pulmonum* et debilitas conjunguntur.

Aliud symptoma hic observandum est, *vocis et loquela* status. Vox a musculis glottidis pendet, et ea ratione ad animalem facultatem pertinet; sed ut cum respiratione connexa hujus loci esse videtur. In morbis vox minuitur, aut vitatur, aut prorsus tollitur: Omnes autem voces vitatae in febribus semper malae sunt, et summum vitae discrimen minantur. Hinc Hippoc. in Coac. praesag. †
 'acuta vox et lugubris, et oculorum obscuratio, &c.' Ibi enim vocem debilem et acutam inter mala signa recenset. Vocem imminutam signum summae debilitatis esse, omnibus fere notum. In *aphonia* tandem desinit, quae fati imminentis certissimum indicium, praecipue cum aliis signis funestis. In Coacis dicitur, 'Quibus vox in febre intercepta sine judicatione, cum tremore moriuntur.' Et, in alio loco ‡, scribit Hippoc. 'Quae cum exsolutione fiunt *aphoniae* pessimae.' Exsolutione hic intelligit Hippoc. facultatem animalem ac vitalem resolutam vel maxime languentem; ideoque

H

†

mor-

* Lib. 7. epidem.

† Text. 257.

‡ Prorrh. 1. 24.

mortem instare. Exempla sunt in Hippoc. et aliis passim * ; hujusmodi statum eleganter pinxit Hippoc. in historia Pythionis in 3. epidem. praecipue in fine historiae : ‘ Octavo frixit, *voxque eum defecit*, spiritus exilis et imminutus, et decimo mane *sine voce*, multum frigus, febris acuta, multus sudor, obiit.’ Hujus tamen symptomatis ratio vix in promptu est ; sed verisimile videtur quosdam minutos et delicatos motus ex quibus vox pendet debilitate affici. Sed ad signa vis debilitantis ex facultate naturali petenda veniamus.

Signorum ex functionibus naturalibus accurata cognitio ad prognosin in febribus condendam est maxime utilis, praecipue cum excretionibus ad praesagium in aegrotis plurimum facientes ad naturalem facultatem attinent, quam nunc aggrediamur, ab appetentiae et ventriculi statu incipientes.

Debilitas *ventriculi* apparet in *anorexia*, *nausea*, et *vomitu* ; ex statu corporis superficiei a spasmo affectae pendet, ut in doctrina causae proximae febrium optime atque dilucide explicatur ab illustr. usus medicinae Prof. nostro.

Nauseam

* 1. Epidem. aegr. 4. lib. iii. ejusdem operis aegr. 4. Ibidem aegr. 2. et aegr. 14.

Nauseam et vomitum contenta quaedam ventriculi interdum producunt; sed tum etiam res ad debilitatem redit; igitur vomitus febrium pessimarum ex debilitate orientium fere semper symptoma est; ciborum appetentia sublata in febribus est malum, ut Galenus nos docet, ‘fastidium cibi per se ipsum pravam est signum, * &c.’ et Hippocr. de aegris quibusdam in epidemica constitutione mortuis, ‘cibos quosvis perpetuo fastidiebant, non sitiebant †.’ Idem fere accidit in Euryanactis filia, ‘quosvis cibus toto hoc tempore fastidivit, neque appetivit quicquam, neque sitiit, etsi acri et calida destillatione vexaretur ‡.’

Diversarum secretionum status in febribus non facile observatur; verum est quidem multa de vomitibus, alvi dejectionibus, atque urinis bonis et malis, in antiquorum scriptis inveniri posse; sed ut fundamento potius incerto nituntur, hic praetermittenda sunt. In proxima sect. de vi septica quaedam praefagia ex his excretionibus capienda sunt; ad nutritionem quod attinet, tempus ad mutationem in ea vix sufficit.

Debilitas

* Gal. lib. vi. aph. 6.

† Hippoc. lib. i. epidem. com 1

‡ 3. Epidem, sect, i.

Debilitas interdum apparet in *deglutitione* amissa vel imminuta ; illud tamen symptomata ex locali affectione vel paralyfi oriri potest.

Apparet etiam debilitas in *vesica urinaria* et *intestino recto*; excretiones foecum alvinarum vel urinae involuntariae debilitatem manifeste produunt ; ambiguitas quaedam est in statu comatoso, ubi hoc symptomata non ex instrumentorum debilitate, sed ex memoria laesa, pendet. Sed in priore casu foecum et urinae excretiones involuntariae continuae vel frequentes exquisitae debilitatis indicia sunt. Hoc sensu Hippoc. * ‘ Lethale est etiam quodcunque sine sensu exit.’ Si ex delirio, seu mentis alienatione, oriatur hoc symptomata, minus est periculosum quam si, mente sana et non omnino errante, ab extincto contingat sensu earum partium per quas excretio fieri debet ; alienata enim mens revocari potest, sentiendi autem facultas nunquam.

Quod antea dictum de vis stimulantis signis, nunc dicendum de indiciis vis sedantis, non ex uno vel altero symptomate, sed ex multorum concursu, non ex debilitate in una vel altera functione, sed ex ea quae systema universum inquinare et pessumdare videtur, iudicium docti et prudentis medici capiendum esse.

SECT.

* Coac. praefag. cap. de deject.

S E C T. IV.

Irritationis et Debilitatis conjunctae signa.

QU A E D A M sunt signa quae suspicionem hujusmodi conjunctionis praecipue creant; ea breviter memorare hujus loci est: Talis irritatio saepe in *cerebro* apparet, et topicas inflammationes occultas significat, quales post mortem saepe inveniuntur, quamvis signa inflammationis vulgata antea non apparuissent. Hic observandum, *diathesin phlogisticam* esse interdum *topicam* et maxime periculosam, quum adversus partes ad vitam necessarias dirigitur.

Signum talis affectionis in *cerebro* est lucis et soni intolerantia, quum eodem tempore impetus sanguinis in systemate universo non videtur auctus. Ratio videtur incerta, sed forsitan ex diathesi phlogistica in parte et tono vasorum aucto peti potest. Sed lux praecipua irritatio in hoc casu videtur, et non impetus sanguinis in vasis oculorum.

Ejusdem

Ejusdem generis aliud symptomata est. *Vasa rubra* innumera in *oculi tunica conjunctiva* visa, cum nulla alia signa inflammationis apparent.

Tertium ex irritabilitate et debilitate signum est.

Somnus turbatus, in quo aegroti dormiunt, vigilant, delirantque, ex irritatione quadam in cerebro pendens.

Coma vigil et *typhomania* eodem referenda. Pejus vero signum est, et saepe hujus generis, *vigilia continua*, praecipue cum jactatione et anxietate conjuncta, doloris molestiaeque indicium est; nulla enim anxietatis causa magis pollet ad producendam hujusmodi jactationem quam cerebri irritatio.

Postremum denique signum irritationis et stimuli est

Delirium certi generis: Delirium mite inter signa debilitatis jamdudum contemplati sumus; sed aliud delirium ex conjunctione quadam irritationis atque stimuli oritur, ideoque hoc in loco considerandum venit. Tale delirium est *mite* cum quibusdam irritationis signis, ut agitatione, jactatione, impatentia ex lecto prosilire, &c. stipatum. Irritationis in cerebro non minimae certissimum indicium est.

Huic

Huic signo jungere liceat omnes *motus convulsivos* et *spasmodicos*, qui nedum debilitatis, ut antea dictum, verum etiam irritationis in *genere nervoso*, signa sunt.

Pulsus frequens, parvus, durus, et contractus eundem statum indicat; ex debili actione cordis ejusdem contractio frequens, et evacuatio imperfecta oritur, et ob eandem causam pulsus durus, quamvis signa inflammationis non manifesta sunt; forsitan status irritationis et stimuli nullum indicium hujusmodi pulsu magis manifestum.

Denique, ex *excretionibus* dignoscitur hic status; *urinam* tantum observare nobis facile licet: Hic urina tenuis, decolor, subito limpida, ab antiquis medicis, praecipue Hippocrate, ut signum phrenitidis observata, considerata venit. Sed, ob rationem antea dictam, nihil de urina dicendum.

Signa igitur nunc memorata irritationem in quadam parte corporis, ut in cerebro, manifestant, cum in omnibus aliis partibus debilitas quam maxime obtinet, et irritationis progressum prohibet; haec autem signa in febribus ante omnia eventum exitialem praefagiunt.

SECT.

SECT. V.

Proclivitatis ad Putredinem in Humoribus Signa.

VIS medicatricis et conservatricis naturae *nifus* quidam vim septicam in primis viis saepe monstrant; hinc cibi ex *animalibus* confecti *fastidium*, in febribus frequentissimum, putredinem in *ventriculo* significat; eandem significationem habet *potus acidulati* et *diluentis* magnum in aegrotis desiderium; plurima hujusmodi affectionum exempla in operibus Hippocratis et Galeni extant, in febribus putredinem verisimiliter habentibus; unum est in muliere quadam quae, ‘Tertio a partu die, febre correpta est acuta, horrida, multo tamen ante partum febriculosa decubuerat, *cibumque fastidierat*;’ et in fine historiae, ‘haec perpetuo cibum fastidierat, animo linquebat,’ et tandem obiit *,’ alia exempla passim in Epidem. occurrunt; hunc cibi fastidium alia mala signa saepe comitantur, et tunc signum magis periculi habet.

Putredo

* Epidem. lib. iii. § 3. aegrot. 2.

Putredō etiam saepe dignoscitur *gustu malo* et *nauseoso* ; hoc signum putridos quosdam humores, &c. in ventriculo indicat, quorum vapores ad linguam et palatum exhalantes gustum vitiatum efficit.

Eodem fundamento nititur quando aegri omnia sibi oblata *putrida* et *nauseosa* putant. Nam iidem vapores putridi ex ventriculo orientes, *odoratus* instrumenta inquinantes, hunc effectum producunt.

Foetor in respiratione semper observatur ut putredinis signum maxime notabile, et non parum exitiale ;

Spiritus ore foras tetrum volvebat odorem,
Rancida quo perolent projecta cadavera ritu.

De nat. rer. 6.

Diverforum quidem hominum in sanitate respiratio ex pulmonibus, ex *dentibus carie affectis*, et aliis causis, saepe graveolens est ; sed certum est ex vaporibus putridis a ventriculo talem respirationem in febribus non raro oriri.

Eodem referendi *ructus nidorosi*, ut vocantur, qui putredinem magnopere redolent.

Vomit in intermittentibus ex spasmō, in continuis febribus ex debilitate, in continuis putredinem habentibus ex debilitate cum causa putrida, oritur. Vomitus, si pertinax sit, fere semper putredinem no-

I

†

tat ;

tat ; hujusmodi erant vomitiones antiquorum aeruginosae, nigrae, graveolentes, &c. quarum exempla passim in eorum operibus obvia sunt ; hinc Hippocrates in Prognost. nos docet, ‘ Ocyssimam abolitionem seu mortem indicare vomitionem lividam, si grave oleat ; atque omnes subputres ac foetidi odores in omnibus vomitionibus mali sunt ;’ et in historia mulieris quae in foro Mendacium decumbebat *, ‘ Duodecimo vomuit multa *nigra foetida*, singultus multus, sitis laboriosa ; et decimo tertio *nigra virulenta vomuit*, rigor, circa meridiem muta.’

Alvi Dejectiones, etiam ad vim septicam indagandam multum faciunt ; dejectiones frequentes liquidae, et maxime foetidae, in febribus pessimae sunt ; *colliquativae* vocantur, et post earum accessionem pauci superstites evadunt ; plurima exempla in antiquis adsunt, sufficient autem in praesentia sequentia. Hippocrates ita se exprimit, ‘ Unoque verbo, qui longis morbis vel acutis tenebantur, *ventris vitio* omnes praecipue mortui sunt †.’ Quam sententiam *ducis sui divini* Galenus, in Comment. suo, his verbis confirmat : ‘ Et pestis quoque

* Epidem. lib. iii. aegrot. 12.

† Epidem. iii. com. 3.

quoque illa longissima, quae nostra aetate vulgata est, ex iis qui per alvum vacuantur, omnes prope peremit; quae evacuabantur, erat colliquatio.' Et in Coac. praefag. cap. de deject. multa haec confirmant: 'Dejectio liquida, quae multum ac saepe movetur, aut saepe ac parum, malefica.' Eod. cap. text. 63. 'Quibus morbi diuturnitate jam extenuatis, alvus repente sine causa solvitur, obmutescens, tremulis, illis est moriendum.'

Putredinis signa saepissime apparent in *sanguinis* excretionibus; nulla vel imminuta *coagulatio* in sanguine extravasato putredinis signum est, ut naturam sanguinis nuperis experimentis illustratam peritis facile appareat; sed in hac re quoddam fallaciae periculum est; nam, ob varias et incertas conditiones conspectus sanguinis mutari potest, sed his cautis coagulationis absentia satis vis septicæ praesentiam indicat.

Aliud signum putredinis ex sanguine est; quando globuli rubri cum fero miscentur, *loturae carniū instar*.

Alia conditio putredinem indicans est, quando sanguis bene coagulato similis *minima agitatione* diffunditur.

Sed putridum statum praecipue monstrant *haemorrhagiae* ex variis corporis partibus; diversis
etiam

etiam conditionibus fluunt; interdum enim *men-
ses* in foeminis, sola naturalis haemorrhagia, ob
putredinem vel citius solito, vel aucta quantitate, in
febris manant. Hunc statum in febris etiam
inducant haemorrhagiae ex *renibus* et aliis organis
uriniferis quorum vasa, post vasa uterina, facile
dilatabilia sunt: Hinc *urina sanguinea* in febris
pestilentibus et aliis maxime exitialibus. In febris
typhi generis exquisite putridis sanguis ex a-
liis et maxime inusitatis partibus fluit. Ut enim
impetus ejus varie concitatur, in *intestina crassa* in-
terdum manat, et dejectiones cruentas efficit; sed
superius in canali alimentario lapsus non facile e-
vadit, ideoque coagulatus et nigri coloris est; hinc
atrabilis ab Hippoc. et aliis antiquis, ut multo-
rum malorum fundamentum, memoratur; et *me-
laina* illustr. Sauvage eandem originem habere vi-
detur.

Paucus sanguis e *naribus* erumpens *sine im-
petu* in capitis vasis est signum fluiditatis in san-
guine, ideoque summae putredinis; et in febris
pessimis sanguis ex oculis, auribus, et etiam poris
cutis manat, et symptoma quam maxime lethale
est. Haec signa mortis manifestissima antiquorum
sagacitas non neglexit: ‘Nares pauca stillarunt,
signumque perniciosum fuisse *.’ Tales stillae in
febris

* Hippoc. lib. iii. epidem.

febribus semper malignam earum naturam indicant; cujus exempla divinus Senex eodem libro nobis reliquit: ‘Nam Philiscus quidem, Epamenon, et Silenus, quibus parum quarto die et quinto e naribus stillavit, mortem obierunt.’

Sanguinis stillatio praecipue funesta cum aliis malis signis apparens, ita ‘ex naribus si stillicidium sanguinis fuerit, cum sudore frigido et refrigeratione extremorum, lethale *.’ Mortifera igitur fere semper hujusmodi stillicidia quorum multa exempla in *Coi epidem.* et *Prorrh.* libris tradita studiosi invenire possunt. Multa etiam de aliis sanguinis excretionibus ab antiquis ex eorum experientia notantur; sed, ut magis crises quam putridum statum respiciunt, in hoc loco minus necessaria sunt.

Sanguis autem in hoc statu non semper ex corpore excernitur, sed in varias *telaе cellulosaе* partes effunditur, ibique stagnans *vaporem putridum vitae infensissimum* producit; exempla hujusmodi fatalis effusionis in variis viscerum abdominalium partibus ex sectione cadaverum febribus malignis extinctorum, in operibus accuratissimi *Morgagni* et virorum illustr. *Pringelii* et *Lind* memorantur; de

* *Prorrh.* 1.

de his vero internis effusionibus, vita superstita, non tam facile iudicium, sed in corporis superficie sub epidermide saepe observantur, et ex forma et magnitudine, petechiae, maculae, aut vibices vocantur. *Petechiae* parvae, rotundae, et non eminentes per varios, diversis temporibus, colores varios putredinis gradus manifestant. *Maculae* ejusdem naturae sunt, sed majores. *Vibices* sunt etiam magnae, sed forma oblonga, quasi virgis caesus aegrotus fuisset. Hae omnes magnae putredinis signa sunt certissima, ab antiquis etiam observata, ut ex multis locis Hippoc. et Galeni, et ex historia *pestis Atheniensis*, quam contexuit celeberrimus *Thucydides*, claret. In Sileno, ni fallor, et aliis Hippocratis aegris febribus pessimis correptis, petechiae vel maculae observabantur. *Seri* etiam sub cute effusio putredinem significat.

Alia putredinis signa in variis *excretionibus* obvia sunt; dejectiones foetidae et graveolentes, jam memoratae, malae sunt quidem; sed, nisi cum aliis signis malis appareant, exitium non praesagiunt; nam ex putredine in intestinis crassis tantum stabulante oriri possint, cum reliquum corpus a putredine fatis liberum sit.

Aliud est symptoma hujus generis *sudor olidus et foetidus*; quamvis enim foetor sudoris in universum

versum putredinem non significat, cum multi in summa sanitate hujusmodi sudores habent; sed si in febribus sudores initio non graveolentes paulatim foetidissimi fiunt, suspicionem gravem putredinis creant, praesertim si eodem tempore serum a vesicatoriis, et alia omnia ab aegro orientia, eundem foetorem habent. Denique, si ex toto corpore *exhalatio cadaverosa* oriatur, putredinem exquisitam significat, et de misero aegroto actum est. Egregius poeta saepius in hac dissertatione laudatus multa *debilitatis* et *putredinis* symptomata nobis multo magis facunde et eleganter descripsit.

Atque animi interpres manabat lingua cruore,
 Debilitata malis, motu gravis, aspera tactu.
 Inde, ubi per fauces pectus complerat, et ipsum
 Morbida vis in cor moestum confluxerat aegris;
 Omnia tum vero vitae claustra lababant.

Subsultus tendinum et extremarum frigus.

In manibus vero nervi trahier, tremere artus;
 A pedibusque minutatim succedere frigus
 Non dubitabat:——

Facies Hippocratica, &c.

———Item ad supremum denique tempus
 Compressae nares; nasi primoris acumen
 Tenue, cavati oculi, cava tempora, frigida pellis,
 Duraque;

Duraque; inhorrebat riſtum; frons tenta minebat;
Nec nimio rigida poſt ſtrati morte jacebant.

Haemorrhagiae putridae ita notantur,

Aut etiam multus capitis cum ſaepe dolore
Corruptus ſanguis plenis ex naribus ibat;
Huc hominis totae vires corpusque fluebat.

Et iterum,

Sudabant etiam fauces intrinſecus atro
Sanguine, et ulceribus vocis via ſepta coibat.

Haec omnia in morbi initio interdum apparent cum reactio adhuc viget; ſed multo ſaepius morbo proſecto, et tum ſemper ſignis debilitatis extremae ſtipantur.

Signis plerisque quae mortem in febribus vel reactionis vi, vel ex debilitate, vel ex putredine intentant, nunc contemplatis ſtatuendum eſt *praefagium*, non ex uno vel altero, ſed ex omnibus quae in ſingulis aegrotis occurrunt; et quamvis multa debilitatis et putredinis ſigna conjuncta mortem certiffime praefagiunt, interdum tamen, his etiam praefentibus, *mirae* et plane *inſperatae* ad ſanitatem

tem *restitutiones* eveniunt. Typho cum pessimis signis provento reactio salutaris saepe oritur, et ad crisin evehit; sed qua ratione modoque *natura medicatrix* in hoc casu agit potius ignoratur: Sed eo usque observari possit, cordis actione mediocriter integra, pulsu, pro ratione aliorum symptomatum, nec debili, nec crebro, et infra 120 in 1. nullis putredinis signis manifestis, non desperandum esse; sed debilitate extrema, cum signis irritationis in cerebro et putredinis in humoribus conjuncta, exitium nunquam non expectandum esse. Sed quid multa? Cum *Hippocrate divino* finiam, ‘Nec vitae nec mortis praefagia *unquam absolute certa esse.*’

S E C T. VI.

De Diebus Criticis.

AD prognosin in febribus rite indagandam *dierum criticorum* cognitio maxime necessaria; sine hac enim cognitione rationes concursus et successionis signorum supra dictorum intelligi non possint; tales autem concursus atque successiones symptomatum ad praesagium maxime conferunt. Ad hanc cognitionem assequendam, mutationes quae in febrium progressu necessario et constanter fiunt, nunc contemplandae veniunt. Etiam an tales motus *semper* periodici atque *certi* sunt, et an morbi *duratio* et *eventus* ex his definiti. Haec primo aspectu est summi momenti ac ponderis inquisitio, cum horum dierum observatio non minimam doctrinae antiquorum de prognosi partem constituit, qui dies *decretorios* et *judicatorios* vocabant; et si sententiae non solum antiquorum, verum etiam plurimorum recentiorum maxime prudentium et celebrium fide-
dem

dem habeamus, vere *decretorii* sunt. Ad sensum nostrum in hac re stabiliendum multa argumenta adsunt, ni fallor, firma; sed ea nunc proponere, hujus dissertationis limites multum excederet, et non sine voluptate relinquo, cum academiae et omnibus medicinae cultoribus gratulari possum juvenem ingenuum, eruditum, nobisque multo magis peritum, de hac materia brevi scripturum esse.

In prognosi febrium tentanda doctrinam optimi et nunquam satis colendi magistri illustr. Cullen ut plurimum sequor, non quia ejus est,

Nullius enim in verba juro magistri,

sed quia mihi ex animo videtur verissima et optimis fulcita rationibus. Summa cum voluptate eam doctrinam medicorum antiquorum maxime illustrium consensu confirmatam inveni, et fidenti animo spero, magni illius viri, excellentis et ad omnia parati ingenii, doctrinas errorem superantes, non solum in Britannia sua, sed ubique terrarum edoctas et expolitas videre. De morum comitate, de beneficentia, aliisque animi virtutibus, nihil dicemus, praeconium nostrum longe superant. Vigeat in omnes annos fama, omnia fausta feliciaque ei contingant,

—*Victorque virum volitare per ora.*

Prae-

Praefatio nostro sic ad finem perducto, tantum restat eruditos veniam errorum dare precari, et mendis quibus scateat hoc tentamen, ob brevitatem temporis, currente calamo, ob adversam valetudinem dolore, et molestia scriptum, ignoscere; omnes errores et mendas, et in materie, et in sermone, nostras esse lubentissime agnoscendum; eos enim qui dissertationes a *seipsis* non *compositas*, suo nomine publici juris faciunt, non solum *medicorum*, verum etiam *proborum*, et *literatorum hominum* nomine indignos aestimo. Maxime quidem dolendum est, sermonem Latinum nostris temporibus a paucis cultum esse; merito *clavis literaturae* dicitur, et bene a quibusdam observatur, quod pro ratione qua Linguae Graeca et Romana leguntur et coluntur, earum gentium virtutes notae atque usitatae sunt.

Denique liceat mihi metipsum gratulari ob felicitatem insignem fortis meae qua obtigit studia ponere in academia ubi omnes artes et disciplinae a Professoribus doctissimis atque celeberrimis docentur: Praecipue vero *medicina* in variis ejus partibus a summis et egregiis viris excoletur; his *magistris meis* dilectissimis, et nunquam sine honore
nomi-

nominandis, propter beneficia in me collata gratias maximas et infinitas ago.

—Haec mihi

Semper erunt imis infixæ medullis.

Satis diu in hac academia vixi alium magistrum habuisse *beatissimæ memoriæ*; cheu vere beatae, *amicus humani generis* erat, et non ex eorum numero qui, cum omnia jura divina humanaque violassent, prava et indecora adulatione beatae esse memoriæ dicuntur; *Gregorium* nostrum intelligo, cujus immaturum fatum omnes boni lugent, semperque lugebunt.

Quis desiderio sit pudor aut modus
Tam chari capitis? Praecipe lugubres
Cantus Melpomene, cui liquidam Pater
Vocem cum cithara dedit.

Ergo Quintilium perpetuus sopor
Urget? Cui Pudor, et Justitiæ soror,
Incorrupta Fides, nudaque Veritas,
Quando ullum invenient parem?
Multis ille bonis flebilis occidit.

Summae in sua arte excellentiæ optimus ille
conjunxit pulcherrimum, nostrisque temporibus
rarum, exemplum omnis generis virtutis, ingenii, doctrinae, morumque elegantiae.

Opera

Opera ejus nobiscum manent, amicis et discipulis
solatium, omnibus summae animi benevolentiae,
judicii subacti, ingenii et scientiae,

—Monumentum aere perennius,

Quod non imber edax, non Aquilo impotens

Possit diruere, aut innumerabilis

Annorum series, et fuga temporum.

Horat.

De egregio viro, dum inter vivos esset, C.
Marii verba saepe in animum venere: ‘Mihi, qui
omnem aetatem in optimis artibus egi, benefacere
jam ex consuetudine in naturam vertit.’ Et quam-
vis mortuus est, *exemplo atque scriptis etiamnum*
loquitur:

Non omnis moriar; multaque pars mei

Vitabit Libitinam; usque ego postera

Crescam laude recens.—

Horat.



F I N I S.





ms-





